

Wárágà Pólò dré tisìle Tèsàlòníkèbhá i dré dhi ni rì

Wárágà kònìdhi ni tà àndu ngìle drìdrì dhi

Kònìdhi wárágà Pólò dré tisìle móndyá ka'ìbhá Tèsàlòníkè na dhi i dré dhi ni rì 'i. Wárágà kònìdhi léna dhi, akódhi adré àwoyà ta Gìká dré Tèsàlòníkèbhá ki tà ka'ìka'ì ni tà sè ìndì àyi ki lèle sè, tágba à dré adrézó àyi ki mǐ pfo lavulé gò, ì dré adrézó kizà nya dhi. Adré kpà gòle Yésu ni agòma ni tà tadhá àyi dré, ngóro dré tá tadhálé àyi dré áyi wárágà ni àlo léna dhi tǐni. Tàko, móndí àruka ì adré tá taa àyi dré kinzò sè dhi, kǐtú Yésu dré dra agòzo dhi atsá dre. Di Pólò adré àyi ki lotó, adrézó taa àyi dré dhi, lè móndí zyandre dhi ì kòligí rè zyà Gìká rú gò, agó drìkònzì líyí ro dhi dré apfòzo 'íká gò, Yésu kàgòrò ndò. Adré di àyi ki kodzó, ì kàdréro àyi ki totó tātā, adrélé tròle tà dré tadhálé àyi dré dhi ì rú.

Adré kpà àyi ki kodzó, ì kòtayíró àyi adrélé tòbvo ró ko. Be ró dhi, ì kàdré àzì 'o ngóro dré tá 'òle àyi kòfalé dhi tǐni, ìndì ì kòtayí àyi adrélé landèle tà dóro 'òma sè ko.

Tà kàdrìkàdrì wárágà kònìdhi léna dhi ki aǐma

1) Mòdo fèma (1:1-2)

2) Àwoyà fèma Tèsàlòníkèbhá ki tà ka'ìka'ì ni tà sè dhi (1:3-12)

- 3) Tà tadhálé Yésu ni agòma ni tà dri dhi (2:1-17)
 4) Tà zĩma Giká tí dhi, ìndì àzì 'òma (3:1-15)
 5) Mòdo kùdù (3:16-18)

Mòdo fema

¹ Ma, Pólò, túmání Sílà ìbe ìndì Tĩmòtéyò be dhi i, mà adré wárágà kònìdhi ni tisì Ekèlézyà Tèsàlòníkè na dhi dré, àmi adrèbhá Giká àma ki Atá àdhya ró ìndì Mírì Yésu Krísto àdhya ró dhi i dré.

² Giká àma ki Atá i Mírì Yésu Krísto be dhi ì kòbhà àyi ki togó tani àmi rú, ìndì ì kòfè tà kèdrìkèdrì àmi dré!

Tèsàlòníkèbhá ki tà ka'ika'i, ìndì tàbvó Giká dré dra tàle gyägya lókyá kùdù sè dhi

³ Ama ki adrúpi i, lè mà kàdré ngbú àwoyà ta Giká dré àmi ki tà sè. Tà nda kòdhi gyägya, tàko ko, mì adré Giká ni ka'i togó wáyi sè adrézó lile ába drìdrì. Àmi títí, mì adré kpà ru le àmi kòfalésè adrézó lile ába drìdrì.

⁴ Tà nda sè dhi, mà adré àmi ki tà ta drì be kuru Ekèlézyà Giká àdhya i kòfalésè. Mà adré tàà àyi dré dhi, mì adré Giká ni ka'i, adrézó togó tsi, tágba à dré adrézó àmi ki mì pfo lavúlé gò, mì dré adrézó kizà nya dhi.

⁵ Tà nda kòdhi ì adré tadhá dhi, Giká adré tàbvó ta gyägya. Tàko ko, kizà mì dré adrélé nyàle kòdhi ì sè dhi, Giká ni àmi ki 'o kitswálé àyi Opì mì dré adrézó kizà nya ásà dhi sè.

⁶ Tà bàti ró dhi, Giká gyägya. A ni kizà logó móndyá adrèbhá kizà fe àmi dré dhi i dré gò,

⁷ Tà kìdríkìdrì afèzo àma adrèbhá kizà nya tùmání àmi íbe dhi ì dré. A ni 'òá kònìni lókyá Mírì Yésu dré dra agázó bhù lèsè àyi ángéló rinyi ró dhi íbe dhi tú.

⁸ Akódhi nda ni alì àtsí adrélépi kòle dhi na, kitswálé tà ño mónnyá Gìká ni nibhá ko dhi ì dri, ìndì mónnyá àma ki Mírì Yésu ni Rúbí Tani gabhá 'òle dhi ì dri.

⁹ A ni tà ño àyi nda ì dri gyǎgya, àyi ki tupfúzó todràle kóná vèsè kólyá, ì kàdréro vwàvwà ro Mírì rúsè, ìndì akódhi ni rinyi m̀lanzìlanzì ro dhi rúsè.

¹⁰ Tà nda ni ru 'o kítú Mírì dré dra agòzo kitswálé m̀lanzìlanzì kisú lindrì be mónnyá lólo títí àyi ka'ìbhá dhi ì vélèsè dhi tú. Àmi ró dhi, m̀ ni adrè kókpà àyi nda ì kòfalé, m̀ dré kúlí mà dré longólé àmi dré dhi ki ka'ìle dhi sè.

¹¹ Tà nda sè dhi, mà adrè tà zi àma ki Gìká tí àmi dré landè àko ró, kò'oró àmi kitswálé tà ì dré àmi ki azízó ásà dhi sè, ìndì kò'oró tà dóro títí m̀ dré adrélé lèle 'òle àmi ki tà ka'ìka'ì sè dhi ì kitswálé títí àyi rinyi sè.

¹² Mà adrè zìá kònìni, àma ki Mírì Yésu kòkisúró m̀lanzìlanzì àmi ki tà sè, ìndì m̀ kòkisúró kpà m̀lanzìlanzì akódhi léna, àma ki Gìká ì Mírì Yésu Krísto be dhi ki togó tani bhàle àmi rú dhi sè.

2

Tà dra ru 'obhá drìdrì Mírì ni agòma kandrà dhi ì

¹ Ama ki adrúpi i, kàdré àma ki Mírì Yésu Krísto ni agòma, ìndì àma ki ru kimoma akódhi be dhi ki tà sè dhi, mà adré àmi ki kodzó kònini:

² A kàdré tàá dhi, Mírì Yésu ni kítú atsá dre dhi, mì kòtayí tà nda àmi ki drì kizá yà, kó ngalè àmi ki líndrí tigá yà dhi mbèlè ko. Gba à kàdré tàá dhi, tà nda apfò Tírì Lólo vélésè yà, móndí ki kúlí lésè yà, kó ngalè àma ki tàndi ki wárágà lésè yà dhi, mì kòka'í ko.

³ Mì kòtayí àmi dhya àlo dré litílé ndìndì tà àlo sè ko. Tàko ko, kítú nda kitswá atsálé drìdrì móndí zyandre dhi ki ligima Gìká rú dhi kandrà ko, ìndì dhya drìkònzì líyí ro dhi ni apfòma kandrà ko. Drìkònzì líyí nda, dhya adrélépi lile dràdrà kisú dhi 'i.

⁴ Akódhi nda ni ligí gìká títi móndí ì dré adrézó àyi ki lindrì bha dhi íbe, ìndì ngá títi ì dré adrézó gìká nda ki lindrì bha ásà dhi íbe gò, dré àyi bhàzo gìká nda i drìle títi. A ni ndìndì fi lirílé Gìká ni tépelò na gò, adrélé tàá ngádra 'á dhi, àyi tàndi ína Gìká 'i.

⁵ Lókyá má dré tá adrérà'a àmi kòfalé dhi 'á dhi, má tà zakó tsì tà nda àmi dré dhi 'í?

⁶ Di nyànomvá dhi, mì nì tà adrélépi drìkònzì líyí nda ni apfòma kíkí dhi àdho 'i ya dhi be. Akódhi kitswá apfòle ko, tsàle lókyá ni dré dra kitswázó dhi 'á.

⁷ Tàko ko, rìnyí lùzu ró tàkonzì àdhya kidhó adrélé tà 'o dre. Di, dhya adrélépi rìnyí nda ni kíkí dhi ni go adrélé kíkíá, tsàle lókyá dra akódhi ni tingázó dhi 'á.

⁸ Lókyá nda sè dhi, drìkònzì líyí nda ni apfò.

Di, Mírì Yésu ni akódhi ni pfu dràle áyi la'a sè, akódhi ni tà 'òzo akíle áyi atsama lagulagu ró dhi sè.

⁹ Drìkònzì líyí nda ni atsá Sàtánà ni rìnyí be, adrélé tà twátwa líndrìga ró ìndì kinzò ro dhi ki 'obe.

¹⁰ A ni móndyá adrèbhá lile dràdrà kisú dhi ki lití tà kònzì ki kára títi dhi i sè. Ayi nda ki todrà akíle títi, ì dré tà bàti lèle ka'ile adrízó ásà ko dhi sè.

¹¹ Ásà dhi, Gìká ni tà rìnyí ró dhi ni amù àyi ki lití, ì kòka'iró tà kinzò ro dhi,

¹² í kòbhàró tà móndyá títi tà bàti gabhá gò, ì dré lenzézó tàkonzì sè dhi i dri.

Mì kàdré àmi ki totó tātā!

¹³ Di, àma ki adrúpi Mírì dré lèle ni i, lè mà kàdré ngbú àwoyà ta Gìká dré àmi ki tà sè. Tàko ko, Gìká kípè tá àmi kitswálé adríle drìdrì móndí àruka i kandrà, Tirí Lólo dré àmi ki bhàle lólo Gìká kandrà dhi sè, ìndì mì dré tà bàti ka'ile dhi sè.

¹⁴ Akódhi azí àmi lídrì tídhí ro nda ni kisú Rúbí Tani mà dré longolé àmi dré dhi sè, mì kòkisúró àma ki Mírì Yésu Krísto ni mìlanzilanzì be dhi bvó.

¹⁵ Di ásà dhi, àma ki adrúpi i, mì kàdré àmi ki totó tātā, adrélé tròle tà mà dré tadhálé àmi dré dhi i rú, kàdré kúlí sè yà, kó ngalè wárágà sè yà dhi.

¹⁶⁻¹⁷ Ama ki Mírì Yésu Krísto ni tàndi i Gìká àma ki Atá be dhi i kòtimbà àmi ki togó, rìnyí fèzo àmi dré, mì kòkitswáró ngbú adrélé tà dóro 'o, adrézó kpà kúlí dóro ta. Tàko ko, Gìká nda lè àma tò gò, tà adrézó àma ki timbà nyo dhi ni

afèzo àma dré túmání tà mà dré adrézó mǐ bha ása dhi be áyi togó tani sè dhi nì.

3

Pólò lizí Tèsalòníkèbhá kǐ ti, ì kàdréro tà zi Gǐká tí í dré

¹ Kùdù ro dhi, àma kǐ adrúpi i, mǐ kàdré tà zi Gǐká tí àma dré, Mírì nǐ kúlí kàdréro la'úlè lèlè drìdrì, ìndì móndí ì kàdréro kúlí nda nǐ no lindrì ro, ngóro tà nda dré adrélé àmi véna dhi tǐnì.

² Mǐ kàdré kpà tà zi Gǐká tí, kàpáro àma móndí kònzì adrèbhá ligilé í rú dhi ì drígásè. Angyá ko, móndyá títí dhi ì kitswá Gǐká nǐ ka'í ko.

³ Dì, Mírì kitswá ína adrélé ka'ìlè togó wáyi sè. A nǐ àmi kǐ timbà àmi kǐ tà ka'íka'í na, adrézó àmi kǐ likí Dhya kònzì nǐ tà sè.

⁴ Mà adré ka'íá Mírì na tàlè dhi, mǐ adré tà mà dré adrélé tàlè mǐ kò'o dhi kǐ 'o, ìndì mǐ nǐ go adrélé 'òá.

⁵ Mírì kàsé àmi kǐ togó í vélé, mǐ kònró Gǐká nǐ lèlè bàti, adrézó kpà togó tsi, ngóro Krísto dré adrélé àmi kǐ fe 'òá dhi tǐnì.

Azì 'òma Pólò àdhya tǐnì dhi

⁶ Ama kǐ adrúpi i, mà adré àmi kǐ kodzó Mírì Yésu Krísto nǐ rú sè: Mǐ kàdré ru su àmi kǐ adrúpi adrèbhá tòbvo ró, adrèbhá kpà tà mà dré tadhálé àmi dré dhi kǐ lebè ko dhi íbe ko.

⁷ Àmi kǐ tàndì mǐ nǐ tàlè dhi, lè mǐ kàdré tà 'o àmakya tǐnì dhi be. Angyá ko, àma tá àmakya tòbvo ró àmi kòfalé ko.

⁸ Mà nya tá kpà dhya àlo nǐ ngá àngyá ko. Be ró dhi, mà 'o àmakya àzì kòkóròko landèzo kítú

be ìndì ngátsi be, àma kí tà kòlanzìró àmi kí àlo dri ko.

⁹ Tágba mà dré tá adrézó rìnyí íbe kítswázó ngá zi àmi tí bwà dhi, mà zi tá ngá àlo àmi tí ko, mì kàdréro tá no àma rú gò, adrézó 'òá àmakya tíni.

¹⁰ Tàko ko, mà dré tá adrérà'a àmi kòfalé dhi 'á dhi, mà lazí tá tà àmi dri kònini: «Lè dhya adrélépi àzì le 'òle ko dhi kònya ngá ko.»*

¹¹ Mà adré tàá kònini tàko ko, mà adré yíá tàle dhi, móndí àruka àmi kòfalé dhi ì tayí àyi adrélé tòbvo ró. Ayi nda ì adré àzì 'o ko. Be ró dhi, ì adré àyikya tífílé móndí kí tà ì 'ásè.

¹² Mà adré di tà lazí mónyá làsú be kònini dhi ì dri, adrézó àyi kí kodzó Mírì Yésu Krísto ní rú sè: Ì kàdré àzì 'o togó be liri, adrézó àyi kí tàndi kí ngá nya kòdha.

¹³ Di, àmi, àma kí adrúpi ì, mì kòtayí àmi adrélé landèle tà dóro 'òma sè ko.

¹⁴ Dhya àlo àmi kòfalé dhi kàdré kúlí mà dré tisìle wárágà kònidhi léna dhi kí ka'ì 'òle ko dhi, mì kònò akódhi nda dóro, adrézó ru su akódhi be ko, kanyò kò'oró akódhi be dhi bvó.

¹⁵ Di tágba kàdré kònini yà dhi, mì kònò akódhi àmi kí kàribhá ro ko. Be ró dhi, mì kàdré àmikya akódhi ní kodzó àmi kí adrúpi tíni.

Mòdo kùdù

¹⁶ Nyànomvá dhi, Mírì tà kìdríkìdri líyí ro dhi ní tàndi kòfè tà kìdríkìdri àmi dré lókyá wáyi ì sè, ìndì látí wáyi ì sè. Mírì kàdré tùmání àmi íbe títi.

* **3:10 3:10** A kònò 1 Tèsalòníkèbhá ì 4:11.

¹⁷ Ma, Pólò, má adré kúlí kònì kì tìsì áma tàndì nì drígá sè, mòdo fèzo àmì dré. Má adré kúlí tìsì kònìni áma wárágà títí i 'àsè, tadházóá dhi, má tìsì ma.

¹⁸ Áma kì Mírì Yésu Krísto nì togó tani kàdré àmì íbe títí!

Logo (Logoti)
Logoti (Logo): BUKU TA TIDHI//RU YIZO DHI ADHYA
New Testament

copyright © 2015 Wycliffe Bible Translators, Inc.

Language: Logo

Contributor: Wycliffe Bible Translators, Inc.

All rights reserved.

2025-05-10

PDF generated using Haiola and XeLaTeX on 10 May 2025 from source
files dated 10 May 2025

942af0a0-42ea-5477-8f1a-fed39823f32b